

**ՀԱՄԱԳՈՐԾԱԿՑՈՒԹՅԱՆ ՀԱՄԱՁԱՅՆԱԳԻՐ**

**ՀԱՅԱՍՏԱՆՈՒՄ ԳՈՐԾՈՂ ՇՊԱԿ-ՆԵՐԻ ԱԶԳԱՅԻՆ ՑԱՆՑԻ ԵՎ  
ՀԱՅԱՍՏԱՆԻ ՓՈՔՐ ԵՎ ՄԻԶԻՆ ԶԵՆՆԱՐԿԱՏԻՐՈՒԹՅԱՆ ԶԱՐԳԱՑՄԱՆ ԱԶԳԱՅԻՆ  
ԿԵՆՏՐՈՆ ՀԻՄՆԱԴՐԱՄԻ ՄԻԶԵՎ**

Հայաստանում գործող Շահերի պաշտպանության և աջակցության կենտրոնների և ընդունարանների (այսուհետ՝ ՇՊԱԿ) ցանցը, որոնք գործարկվում են «Հայաստանի երիտասարդ իրավաբանների ասոցիացիա» հասարակական կազմակերպության (գործարկում է Երևանի, Լոռու, Սյունիքի, Կոտայքի, Արարատի, Շիրակի, Տավուշի, Վայոց Ձորի, Արագածոտնի ՇՊԱԿ-ները և Թալինի, Ապարանի հենակետային ընդունարանները), «Արմավիրի Զարգացման կենտրոն» հասարակական կազմակերպության (գործարկում է Արմավիրի ՇՊԱԿ-ը), և Գեղարքունիքի մարզի առևտրաարդյունաբերական պալատի (գործարկում է Գեղարքունիքի ՇՊԱԿ-ը) կողմից, ի դեմս Կարեն Զադոյանի, Նաիրա Առաքելյանի և Արփինե Բաղդոյանի, մի կողմից, և Հայաստանի փոքր և միջին ձեռնարկատիրության զարգացման ազգային կենտրոն հիմնադրամը (այսուհետ՝ Հայաստանի ՓՄՁ ԶԱԿ), ի դեմս գործադիր տնօրեն Վարազդատ Կարապետյանի՝ մյուս կողմից, (այսուհետ՝ Կողմեր)։

- ✓ *Կարևորելով Փոքր և միջին ձեռնարկատիրության (ՓՄՁ) ոլորտի շահերի պաշտպանության և ոլորտում կոռուպցիոն ռիսկերի նվազեցմանն ուղղված գործողությունների իրականացման անհրաժեշտությունը,*
- ✓ *Ձգտելով հնարավորինս չափ նպաստել փոքր և միջին ձեռնարկությունների շահերի և իրավունքների ոտնահարման կանխարգելմանը ու որոշումների կայացման գործընթացում դրանց մասնակցության ապահովմանը,*
- ✓ *Գնահատելով ՇՊԱԿ-ների դերը կոռուպցիայի դեմ պայքարի, իսկ Հայաստանի ՓՄՁ ԶԱԿ-ի դերը ՓՄՁ-ների գործունեության արդյունավետության բարձրացման գործում,*
- ✓ *Կարևորելով Հայաստանի ողջ տարածքում ՓՄՁ-ների իրավագիտակցության և իրազեկության բարձրացումը,*
- ✓ *Անհրաժեշտ համարելով ոլորտում կոռուպցիոն ռիսկերի նվազեցմանն ուղղված ընթացակարգային և համակարգային բարեփոխումների մշակումն ու այդ բարեփոխումների ընդունմանը նպաստելը,*
- ✓ *Ընդգծելով ՓՄՁ ոլորտում առաջացող հարաբերությունները կարգավորող արդեն ընդունված և ընդունվելիք նորմատիվ ակտերի վերաբերյալ կայացվող որոշումները հրապարակային և թափանցիկ դարձնելու, լուսարանելու, ճիշտ ըմբռնելու ու կյանքի կոչելու գերակայությունը,*
- ✓ *Առաջնորդվելով օրենքի գերակայության և բարոյական վարքագծի հավասարակշռությամբ,*

Կնքեցին սույն Համագործակցության համաձայնագիրը (այսուհետ՝ Համաձայնագիր)՝ հետևյալի մասին.

**1. Համաձայնագրի նպատակները**



- 1.1. Կողմերը միավորում են ջանքերը հետևյալ նպատակներով՝
- Նպաստել ՓՄՁ ոլորտում կոռուպցիայի կանխարգելմանը և կոռուպցիոն ռիսկերի նվազեցմանը,
  - Աջակցել ՓՄՁ ոլորտում կոռուպցիայի դեմ պայքարի արդյունավետության բարձրացմանը,
  - Բարձրացնել ՀՀ ողջ տարածքում փոքր և միջին ձեռնարկությունների իրազեկության և իրավագիտակցության մակարդակը,
  - Նպաստել ՓՄՁ ոլորտում կոռուպցիոն ռիսկեր պարունակող օրենսդրության ընթացակարգային և համակարգային փոփոխությունների կատարմանը:

## 2. Համագործակցության հիմնական սկզբունքները

- 2.1. Մույն Համաձայնագիրը սահմանում է Կողմերի միջև համագործակցության հետևյալ սկզբունքները.
- Կողմերի միջև համագործակցությունը հիմնված է ՀՀ Սահմանադրության, ՀՀ օրենսդրության, ՀՀ միջազգային պայմանագրերի և սույն Համաձայնագրի դրույթների վրա,
  - Համագործակցության ընթացքում Կողմերն առաջնորդվում են օրինականության, իրավաբանական օգնության իրավունքի ապահովման, օրենքի առջև հավասարության, համադեկլարման, համապատասխան պատասխանատվության, թափանցիկության և ժողովրդավարության սկզբունքներով:

## 3. Համագործակցության ուղղությունները

- 3.1. Կողմերը համաձայնվում են իրականացնել հետևյալ գործունեությունը.

### 3.1.1. ՇՊԱԿ-ների ազգային ցանցը համաձայնվում է՝

- ՓՄՁ-ներին հնարավորություն ընձեռել արձանագրելու հանդիպած կոռուպցիոն դեպքերը և արձագանքել ստացված դիմումներին,
- Ապահովել անհրաժեշտ իրավական տեղեկատվության և անվճար խորհրդատվության տրամադրում, կոռուպցիոն ռիսկերի առկայության պարագայում իրականացնել ՓՄՁ-ների շահերի պաշտպանություն պետական կառավարման, տեղական ինքնակառավարման մարմիններում, դատական ատյաններում,
- Բացահայտել ոլորտին առնչվող օրենսդրության և դրա կատարման, ինչպես նաև ընթացակարգերի թերությունները, որոնք տեղիք են տալիս կոռուպցիոն ռիսկերի առաջացման,
- Քննարկել և մշակել բարեփոխումների ռազմավարություններ, առաջարկներ, հետևել դրանց ընդունման գործընթացին:

### 3.1.2. Հայաստանի ՓՄՁ ԶԱԿ-ը համաձայնվում է՝

- Աջակցել ՇՊԱԿ-ների կողմից ՓՄՁ-ներին տրամադրվող այն տեղեկատվության ամբողջականացմանը, որն անմիջականորեն կապված է ՓՄՁ-ների բողոքներին առնչվող օրենքներով, ենթաօրենսդրական ակտերով, կանոնակարգերով կամ ներքին փաստաթղթերով պայմանավորված ընթացակարգերի հետ,
- Հաշվի առնելով ՇՊԱԿ-ների և Հայաստանի ՓՄՁ ԶԱԿ-ի մ/ճ-երի կողմից հավաքագրված և վերլուծված տեղեկատվությունը և ուսումնասիրությունները, օրենքով վերապահված լիազորությունների շրջանակներում, համատեղ նախաձեռնել և մշակել կոռուպցիոն ռիսկեր պարունակող օրենսդրության ընթացակարգային և համակարգային փոփոխություններ, հետամուտ լինել դրանց ընդունմանը,
- Տրամադրել ՇՊԱԿ-ներին ամբողջական տեղեկատվություն ՓՄՁ ոլորտում առկա կոռուպցիոն ռիսկերի վերաբերյալ, ինչպես նաև կոռուպցիոն ռիսկեր հանդիպած ՓՄՁ-ներին և դրանց ներկայացուցիչներին ուղղորդել ՇՊԱԿ՝ գործին օրենքով սահմանված կարգով լուծում տալու նպատակով,
- ՇՊԱԿ-ների հետ համատեղ նախաձեռնել և անցկացնել տարածաշրջաններում ՓՄՁ-ների իրազեկմանն ուղղված աշխատանքներ, հանդիպում-քննարկումներ, ներկայացնել ՓՄՁ ԶԱԿ-ի գործունեության ուղղությունները, ՓՄՁ-ներին տրամադրվող աջակցությունն ու քննարկել հնարավոր համագործակցությունը,
- Օժանդակել ՇՊԱԿ-ներին Երևանի և ՀՀ մարզերի փոքր և միջին ձեռնարկությունների ներկայացուցիչների և երիտասարդ իրավաբանների համար Երևանում և ՀՀ մարզերում արբիտրաժի վերաբերյալ իրազեկման սեմինարների կազմակերպմանը և անցկացման հարցում,
- Օժանդակել ՇՊԱԿ-ներին կազմակերպելու արբիտրներ վերապատրաստելու հատուկ ուսուցումներ,
- Նպաստել ՇՊԱԿ-ների և Հայաստանի ՓՄՁ ԶԱԿ-ի մարզային գրասենյակների միջև փոխգործակցության ապահովմանը:

### 3.1.3. Այլ դրույթներ

- Պարբերաբար աշխատանքային քննարկումներ կազմակերպել կողմերի ներկայացուցիչների, ՇՊԱԿ-ների ներկայացուցիչների մասնակցությամբ ՓՄՁ-ների դիմումներին ընթացք տալու և դրանք բավարարելու օրենքով նախատեսված ընթացակարգերը ճշգրտելու օրակարգերով,
- Կողմերից որևէ մեկի առաջարկության դեպքում Հայաստանի ՓՄՁ ԶԱԿ-ի կամ ՇՊԱԿ-ների գրասենյակներում անցկացնել խորհրդակցություններ և քննարկումներ:

## 4. Եզրափակիչ դրույթներ

4.1. Մույն Համաձայնագրով սահմանված համագործակցությունը համակարգում և վերահսկում են Կողմերի ղեկավար մարմինները՝ լիազորված անձանց միջոցով:

4.2. Սույն Համաձայնագրում փոփոխություններ և լրացումներ կարող են կատարվել միայն կողմերի փոխադարձ համաձայնությամբ՝ համաձայնագիր կնքելու միջոցով, որը կհանդիսանա սույն Համաձայնագրի անբաժանելի մասը:

4.3. Սույն Համաձայնագիրը կազմված է չորս էջից, հայերեն լեզվով, հավասար իրավաբանական ուժ ունեցող երկու օրինակներից, յուրաքանչյուր կողմին տրվում է մեկական օրինակ:

4.4. Սույն Համաձայնագիրը ուժի մեջ է մտնում ստորագրման պահից:

ՇՊԱԿ-ների ազգային ցանցի կողմից՝	Հայաստանի ՓՄՁ ԶԱԿ-ի կողմից՝
<p style="text-align: center;">Կարեն Զադոյան «Հայաստանի երիտասարդ իրավաբանների ասոցիացիա» ՀԿ նախագահ</p> <p style="text-align: center;"> Կ.Տ.</p> <p style="text-align: center;">Նաիրա Առաքելյան Արմավիրի զարգացման կենտրոնի գործադիր տնօրեն</p> <p style="text-align: center;"> Կ.Տ.</p> <p style="text-align: center;">Արփինե Բաղդոյան Գեղարքունիքի մարզի առևտրաարդյունաբերական պալատի լիազոր ներկայացուցիչ</p> <p style="text-align: center;"> Կ.Տ.</p>	<p style="text-align: center;">Վարադատ Կարապետյան Գործադիր տնօրեն</p> <p style="text-align: center;"> Կ.Տ.</p> <p style="text-align: center;"></p>